

Sagstõõllmõõžž Teänjoogg kue'llšeellem-meärrõõzzin juätkkje – e'tkkõs luõss-šeellmõõžž kiõlddjest ciälklmid

Lää'dd da Taarr sagstâ'le Teänjoogg puõ'tti kue'llšee'llempââ'j kue'llšee'llem-meärrõõzzin liâ kõkknam. Kue'llšee'llem-meärrõõzzid lij jõuddum ta'rkstõõllâd o'ddest ciälkâlm-maacctõõzzi vuâdald kuhttu jânmmest. Öuddnemvaajtõsmäinnan lij kaggõõttmen tõt, što luõss-šeellmõš e'tkķeet ķe'lddemnalla.

Vuõssmõs sagstõõllâmpuädõs, ko'st kue'llšee'llem-meärrõõzzid o'cceš muttâz riikksuâvtõõzz asetõõzzin, le'jje ceä'lķķemnalla 28.3.2022 räjjä. Luõssnaa'li samai rää'sš vue'jj diõtt luõss-šeellmõ'sše e'tkķees kõrr rää'jtõõzzid. Luõss-šeellmõõžž le'čči kuuitâg haa'lääm seännad vuä'nkõs ääigas, što vuei'tet tuõ'll'jet Teänjoogg luõss-šee'llemkulttuur vääžn'jummuž šee'llemneävvaivui'm. Jee'res kue'llnaa'li šee'llemvuei'tlvažvuõđin le'jje seämma-ääi'j huõllâm, nääi't Teänjooggâst vuäitči šee'lled puõ'tti kie'zz jee'res kuõ'lid gu luõzz siõmmna kie'ppäab meärrõõzzin gu mõõnni ee'jj.

Taarâst âlddsin puk ciälkâlmuu'di vuâsttlâ'ste e'tkķõõzz luõss-šeellmõõžž sâä'vsummšest mue'dd neä'ttel ääigas. Lää'ddjânmmest vaiggâdvuõttân kaggõõđi tõt, što e'tkķuum luõzz kue'llšee'llemrää'jtõõzz le'jje tõn vee'rd vaiddâz, što tõk õõlgçi teâuddjâ'tted lää'jj tääss'si'žžen ij-ga lääi'vab rää'jtõõzzin vue'kken âarram riikksuâvtõõzz asetõõzz pääi'ķ.

Lää'dd ja Taarr ve'rğğnee'ķķ jouddu tuõttâd vuäžžmi ciälklmi vuâdald, što õudldõõzz čârstoõggid kuõskki pâ'rddķe'rjj vuâllaķee'rjtummša ij leämmaž pâ'zzlâšttam-mannu lo'ppe mõõnee'st, pâi jânmin âlgg suâppâd rä'tkķummši vääras lâä'ssâi'ğğ. Ääi'jab čuäjtõõzzâst âarrai ehdtõõzzâst vânnsab kue'llšeellmõõžžâst ij leäkku leämmaž vuäittmõš vuäžžad õõutmiõllsažvuõđ, di nu't luõssnaa'li rää'sš vue'jj lokku vää'ldee'l rä'tkķummuž ooccât luõss-šee'llemkiõld pääi'ķ. Biolooglânji kue'llšee'llemkiõld lij vuâđđtõõllum, gu tu'tkķeemteâđ mie'ldd Jiõņņmiârâst ma'cce till Teänjoogg čäccõõzz uu'ccben luõzz gu ee'jj mâäiârâ.

Sagstõõllmõõžžid õhttnee'l halltõõzz e'tkkõs lää'ķķen luõss-šeellmõõžž ķeâlddmõõžžâst Teänjooggâst ee'jjest 2022 vuõltteet ciälkâlmkõrvvja. Gu kue'llšee'llempââ'jj lij ju'n ââlda, lij äi'ğğtaull čo'rstemnallšem jâ'ttel. Ciälklmid raaukât piâtnâc 7.4.2022 čiâss 14.00 räjjä. [Ciälkâlmraukkmõš käunnai tääi'ben.](#)

Jee'res kuõ'li gu luõzz šeelldmõõžž kuõskki kue'llšee'llem-meärrõõzzi beä'lnn plaan mie'ldd lij äiggmõš ouddned ju'n suâppum muttsi meâldlânji.

Lâä'ssteâđ mädd- da meä'cctäällministeriast:

Vesa Ruusila, luâttskâatrdemtäällduumšeķ, te'l. 02951 62051, vesa.ruusila(at)gov.fi
Tapio Hakaste, sagstõõlli ve'rğğooumaž, te'l. 02951 62152, tapio.hakaste(at)gov.fi